

'ի Սուրխաթ¹ և 'ի կողմանս սոցա . . . յայնժամ՝ զօրացաք մեք և բազմացաք և շինեցաք զգիւղս և զգաւառս իշխանք և ազնուականք. 'ի Ղարապազարէն սկսեալ մինչև 'ի Սուրխաթ և 'ի Ֆէօդօսիա, 'ի լերինս և 'ի դաշտս լի արարին վանօրէիւք և եկեղեցեօք, շինեցաք տունք 100,000 և զեկեղեցիս 1000, և 'ի ահէ Հոնականաց պարսպեցին 'ի քաղաքին Ֆէօդոսիա »: Մեզ այնպէս կ'երևի որ այս 'ի Ղրիմ գաղթող բիւրաւոր հայկազանց մի մասն, այսինքն 40,000 հոգի, գործածելու յարմար անձինք, կամ պարզ զրուցելով՝ զօրականք, Ղրիմէ դէպ 'ի հիւսիս դիմած են, ինչպէս յԱխսարայէ մինչև 'ի Ղրիմ պատերազմելով և ճեղքելով Թաթարաց խումբերը՝ կու գան, նոյնպէս աստի այսինքն 'ի Ղրիմէ մինչև ցկամենից՝ նոյն թշնամեաց դէմ սուր գործածելով կը հասնին: 1331 ին կը դնէ Անտոնի Հայոց մեծ գաղթականութիւնը 'ի Կամենից: Յարմար միջոց կը գտնան Հայք՝ հայրենեաց (կործանեալ Անույ) քանդեալ և կործանեալ եկեղեցեաց և պալատից վրէժը հանելու 'ի տնաւեր Թաթարաց. կը խառնուին Կորիաթովիչ իշխանաց զօրախմբին մէջ և հալածելով զԹաթարս՝ բնակութիւն կը հաստատեն Կամենիցի մէջ. և տակաւ պատերազմական սուրերն վաճառականութեան տուժարներու փոխելով՝ ձեռք կը զարնեն փոխանակ Անույ զԿամենից շէնքընել: Կորիաթովիչ իշ-

1. Սուրղաթ՝ այժմեան Հին-Ղրիմն է. ոմանք նմանաձայնութենէ շփոթելով զՍուտաղ կը կարծեն, որ սխալ է. Սուտաղի հին անունը՝ 'ի Յունաց է Սոկոէա, 'ի Ճենովացոց՝ Սօլտայա (Soldaja), մեր ձեռագրաց մէջ կայ Սուղգա գրուած: